

Tito rai

Faborohacha letoai

“Inara coaaucuaun” naa Faborone

1 ¹Canu Faboro nichaaunnena, nii coitucuhiche raotojeeinne rijijieein, Cana Coaunera jerenohineein rai Calaohi Jesocurisito letono afosotoneeun. Acate caletoeae, satiin chauratane sacuritaain janijiin nii ranojoihunru rai amuhemujueein beebelijhanune, ²rauhijiriin coreniha cana osa caje nichoteein jianacoon neein, chabana satonoelanaala nenea ichaonaa teranihane cohajihacachene coina. Chabana cana coritaai Cana Coaunera. Acate nitohaneein cana rai ichaonaa tihane coina aitelu, cana rai chauratane coaunaane ajiniha. ³Inae nii jihanteein aitohalune jaa que turuhane jaaunte, inae nii aca jianacoon cana osa caje cana mitaeranihane coitucueratein beebelijhanune coina caletoaclu Cana Coaunera.

⁴Nii jaunna caa ichei quiricha laenaain letoaaunra Tito. Iite esinaen rauhijiriin canu calaohineeii, cacoreniha nii canaacha esenetai Jesocurisito esenetaaine jaun. Cana Inaca Cana Coaunera, Cana Ichotera Jesocurisito, naaonjoaain raotojoein neeine jaanu teeuruhine ii raite aina raotojoein jianacoo neeine coina.

Curetau Cana Coaunera
coitucuurera relaa Titone

⁵Nii Curetau cobenau ii ratirihanune ajiniha taone, jaiti rucuhera coina lananacaauru rucujueein, iclesiacuru naineein Cana Coaunera coitucuureraauru- canaacha relaaauri coaranu que acaauru bichauhenaauru cocoaainaine coina ichei aitoonlu. ⁶Nii le iclesiacuru bichauhenaauru bichauhena cocoaainohichuru, cojuriu nitohanei coaraneein nenea tocohaneein suujua coaraain ichaohine, nabana que tonaain iriha chunine coataa. Chaen techu leinjiin eneecha que sinijeraaocane caohachae. Jana rai calaohichuru netonai Jesocurisito esenetaeranein, caohachaaain suujua coaraain erenaa tonoraain neeuruhine, nabana baasoneein erenaa tonoraelanaala ichaauruhane, acaauru que ereein niha chunine coataa. ⁷Nii Cana Coaunera ranojoinuri iclesia coaraneein- acaauru bichaheneenein nenaate, jeriha Cana Coaunerane rijijieein caohachaaain suujua coaraain, que Cana Coauneraaacha icharatei ichaain rauhijiriin ichaohane caohachae. Nainiheii erenaa tonoraelanaala, namute cacha coiintetiin, ajetoritiiin, ita cotainaa rautatiin, asijiautoneein,

naonjoaain ichaohane. ⁸Nitohaneein baasoneein ichoaelanaala, turuhin niha cachane belaaain, cotijiaain, loreri asae raain, naonjoaain ichaohine. Chaen techu caohacha ichaera cachaneein, caohatiin suujua coaraain, Cana Coaunera que banijiaaineein neein, chabana jeriha suujuane rijijieein ichoaelanaala, naonjoaain nihane caohachae. ⁹Nii esinae rauhijiriin aitiin relaeraalune jaacha tonoraain, acaacha esenetaain que leeochoaauru relaaine, acaauru netonai leeochoaauru suujua lararajiaain nerelaacachene jaan coitucuerateeuruhane coina. Chaen nii caohateein erenacaauru relaain acaauru suujua baaso aninoainete, acaauru netonai esenetaauruhine.

Relanajaurera baaso

¹⁰Arajiichurute, nii acaauru relaacane jaan tonorana jerelanaala, “Jorioniheichuru jaberoco macohi cari saeratelaanaala nena, nainihe Cana Coaunera esenetaeraneein ranojoneein nihane,” naain nechu jataain cha coitucuure-nihane jaun cachaaauru coritaaure. ¹¹Niritiin erenacaauru erete, caohachare niritocuruhane coataa caohatihacane. Nii casaje aina cuaainte laurijiracuru aina arajii cachaaauru suujua auhacaain, cachaaauru coritaaain, arajii coriqui ranaa coaacure.

¹²Coaraunachuhinti nii Cureta cobenau nena *profeta*, nii jeelai acaauru araacha: “Satiin Cureta cocoaichacurute casajenetiin, necha ansai ataebinae rijijieein neein, bajeritiin, achotoritiin, naonjoaauru,” naain acaauru ichao bihalune. ¹³Esinae rauhijiriinte acaauru ichao coaraane jaun aitelu. Aihana jaun, caohachaaain laraajiin acaauru relaau, coujurihu Jesocurisito esenetaeraneein nena tocoaneein neeuruhane coina, ¹⁴nabana,

nii suujua caje rocohin relanajaaunruha Joriocurune jaancha esenetaauruhane coataa. Niheichu nainecuruhi Jesocurisito esenetaeraneein neeuruhane sainejeein que jaolequiin, nii naitoonjoan tonoraelanaala nenacaauru ere tonoraauruhane.

¹⁵Caohachaaain suujua coaraain niha cachanete, itolereneein nichanaane maajeein caohachaaain coanojoi ne. Jana canaacha esenetai esenetaelanaala nenaate baaso nejesina que coacuhin itolere bana baasoneein ne, nichanaane maajeein, nechu jataain baasoneein coacuhin cha ichacuruhane jaun. ¹⁶Cana Coaunera coitucutohate niqui nocoetocure, nete acaauru ichanaacha caje coitucunojoinecure baasoneeuruhane. Namute cacha cotairiin, namute cacha que erenajaauharitiin, erenaa tonoraelanaala neein, nii charijibana caohacha ichaain neuruhi.

Nohanelanaala relanajaacachene jaan

2 ¹Caohachaaain nii ichelaanune jaan tonoraain, esinae rauhijiriin que acaauru relainete caohachae. ²Nii acaauru bichauhenaaaurute, esinae rauhijiriin tonaain ereeuruha chaachacuruhane coinane, nii naitoonjoa ichaain ichaauruhane caohachae. Esinae rauhijiriin nii niicha esenetai rijijieein neein, satiin belaaain, laraajiin, naonjoaain ichaohine, itolere necairichanaa abaataain nena nainihane coina. ³Jerichanejeein techu, coujuriu inara bene bichauhenaaauru jeriha Cana Coaunerae rijijieein ichaohin, ajetoriaanelanaala, erenacaaotelanaala, naonjoaain que coacuelanaala, caohachaacha que coacuhin neeuruhane caohachae.

Coujurihu ranunaauru bichauhenaneein nena tocohaneein, ranunaauru notajaain, ⁴rai sinijeraauru aina rai

bereecuru belaaïn neeuruha ranunaaurune coina acaauru relaain, ⁵caohachaaïn itolere que nainaaïn suujua coaraain, loreri asae nenacaaurune maajeïn beraain, osa que nesaruhin, barijitiin, naaonjoaaïn neeuruhane coataa acaauru suujuateïn nihanete caohachae. Chaen acaauru sinijeraauru aina ita suujua rijijieïn coacuhin neeuruhine, nabana tonaain Cana Coaunera coitucueraneïn neeuruhane saïnejeïn acaauru que iriha cachane coataa.

⁶⁻⁷Jerichanejeëin chu caohacha nejesina ichaaïn nii enamanaacuru notajaain acaauru que corajerateeu. Acaauru relaaine caohachaaïn ii suujua coaraain, coujuriu ichauhenaneïn nena tocuhaneïn, ⁸raotojoeïn acaauru rai ereïn canaacha esenetai que aitiin acaauru relaa, nabana tonaain baasoneïn cana que erena nainiha chunine coataa. Nitohaneïn ichaainete cana que nocoejeëureïn nii acaauru relaacane jaan caohatera rijitiin erenacaauru.

⁹Chaen rai fatoroon ere tonoraain, letoanajaa acaauru fatoroone jaan ichaaïn, tonaain baasoneïn tonorana coacuelanaala neeuruha rai letononeïn nenacaaurune coina suujuateïn relanajaa. ¹⁰Jiaonrihachu asijiauhin neeuruhane. Baaso coacuelanaala caohatiin suujua coaraain neeuruhine. Nii banate, acaauru ichao caje jataain caohatoha Cana Coaunera cana ichoterateraneïn nena que acaauru relaacachene jaan coaracurueïn satiin cachaauru.

¹¹Cana Coaunera cana belaitohane coaratiha, satiin caa chauratane que rai cachaneïn neinichachene ichoteraanu letoaelu. ¹²Acate cana relae, Cana Coaunera coitucuhichuru rijijieïn baaso ichaaechajeïn

nihacachene jianeïn, caohacha que coacuhin, coujuriu Cana Coaunera cachaneïn nena tocuhaneïn rauhijiriin Cana Coaunera corojeeïn caa chauratane que ichaohacachene coina. ¹³Nitohaneëinte nii cana rai tihane coina naitoonjoan nainane cohajeïn raotojoei ichaonaa que ichaohin, turuha urichaaïn nii Cana Coauneraïne cana ichoteraneïn ncaohachaaïn nena Jesocurisitone cohajeïn nihacache. ¹⁴Acatechu itolere baaso canaacha ichai cana osa caje cana ichoteratihane coina rai jaberoco teïn nelu, oha cana corenihane, nii baaso caje cana coulucohin rai cachaneïn caohacha ichanaacha que coacuhin nena coina ichaelu.

¹⁵Nii ichei aitocoaaunne rijijieïn, coointeëuruhane nihanatiin, acaauru que corajerateïn acaauru relaa, coujuriu cocainanohineïn nena tocuhaneïn, nabana nii relanajaaine jaan tonoraanaala ii que jaolecoha chunine coataa.

Esinae rauhijiriin caohachaaïn suujua coaraain neeuruha Cana Coaunera coitucuerane

3 ¹Nabana baitecuruhane coataa, acaauru rai nacoaauneeïn aitoote, coujuriu Cana Coaunera coitucueraneïn nena tocuhaneïn, rai curuaanaa, cocainanacaaihuri, naaonjoainuri ere tonoraain itolere bana jatoroaain neeuruhine caohacha nejesina ichacuruhane coina. ²Jiaonriha tonaain baasoneïn chuni coacuhin ereïn neeuruhane. Niheichu ita sonaa coacuelanaala caohacha cachaneïn ichaohin, jiniiquin ita belaaïn, caohachaaïn neeuruhane coarateïn neeurumiin.

³Jauriaalute cana netonai tonaain irihacachene joanreeïn ererejeto-coache, Cana Coaunera ere tonoraala-

naala nechu jataain nitajenaaneein neein, cana suujua letono rijijieeincha itolere baaso ichaonaa ichaaechajeein nerejetocoaachelu. Nitohaneeinte baaso ichaaechajeein ichaonaa jana, cana que nererojoecaeriin nerejetecuruha leeochoaurune rijijieein ita que nererojoecaeriin nerejetocoaachelu.

⁴Nete satii caa chauratane que cachaneein ichoainichaachene belaitohane coaaratiha, satii cachanichaachene ichoteratelu cana osa caje Cana Coaunera. ⁵Coatiha rai caohacha ichacaachene jaun nii cana ichoteratiheil. Cairichaaajoaain cana coaraane jaunte, nii cana osa caje cana coulucohin cana ichoteratelu. Rai Suujue aina cuaain cana coulucohinte, nacoauneein nejanoaain nenea rijijieein nenea coina cana rai nacoauneein ena nenea ichaonaa telu Cana Coaunera.

⁶Jataain cana belaitohane jaunte, rai Calaohi cana Ichoteraneein nenea Jesocurisito aina cuaain, cana rausiaaeca jelai amuritoeriin rai Suujue telu cana rai Cana Coaunera, ⁷itolere ujuaihoneein nenea caje caohachaain neein nii chariji bana sanaachara nejeein nenea- canaacha cohajei ichaonaa que nenea coina.

⁸Esinaetechuhisi nitohaneein cana osa caje cana coulucohin cana raain ne Cana Coaunera. Nii jaunna ichei aitoon, nii Cana Coaunera esenetaeraauru itolere bana caohachaacha que coacuhin neeuruhane, nii leocha relanajaera ere tonoraelanaala neeuruhane coina acaauru rai aitohine coina. Nitohaneein ichahacachenete, jataain cana rai nelateineein nereein. ⁹Nete laen nii cana rai aitocuruhalu cana coitucueracurune esenetaain,

Moisesa aitoonjoan que ita rohecaain naaonjoaain nenea naineneei. Niite nechu jataain nohanenaaneein nii chaque nelatene cana rai.

¹⁰Niha nitohanei que cachaauru relaaain lerunaa jererane, coroata saain, nichata saain, naaonjoaain cotijiaain rai aitohine jana chere tonorana jerenhane, jelai caje sitaaute amuhine. ¹¹Nitohaneein nenacaauru cachaaaurute itolere osa que nerotocuruhane jaun aihure. Nitohaneeinte acaauruhacha ichai caje osa que nesarucuruhane coanojoi ne.

Nicopolisihu canu cohacu

¹²Inae ichene Artemasi letoaeniha-nune, Tiquico letoaanune, atiin Nicopolisi cuhin canu cohanihute ecu ita coaraca. Ecu ne jelarona bitoaanune coina ucuae ureeunni. ¹³Chaen nii ecu nenea *abogado* Senasi aina Apolo coroatajaneun acaauruhacha latei tein, nabana nii cuuruhanejaun turuuhane reetiaain lanaa acaauru rai acaauruhacha lateine coataa. ¹⁴Canaacha relaneein nenacaauru, itolere que caohacha ichaain, cha latein niha chunucohane coaracuruhane coroatajanena que nerelaaurumiin, nelateineein niha acaauru ichaone coina.

Raotojoein neeuruhane coina aitiin necoia Faborone

¹⁵Satii caniha cau nenacaaurute ii coaacure. Nii ecu nenacaauru canaacha esenetai Jesocurisito coreniha canaacha belaihuri- cana nejeraauru coaucaune beeu acaauru rai. Satii raotojoein neeichene jaanu tein, inara coroatajanemiin Cana Coaunerate raotojoein neeiche.